

## STASIRA MI PREJU D'ESSIRI PUETA

Stasira mi preju d'essiri pueta  
e cu la manu di la fantasia  
posu supra na nuvula cueta  
li megghiu ciuri di la vita mia.

L'odiu lu lassu supra stu pianeta  
lordu di sangu e marcia ipocrisia  
e mi rifuggiu supra na cumèta  
unni c'è amuri, paci e puisia.

Lassu ccà sutta la guerra, lu focu,  
la corruzioni ca c'è peri peri  
e p'un mumentu mi la pigghiu a jocu.

Supra li stiddi volu c''u pinseri  
e fussi megghiu ca ristassi ddocu  
arrassu di sti lutti e sti traggeri!

## SICILIA JISATI

La vuci di Duceziu si zittiu  
su muti li campani di la Gancia,  
c'è cu si ngrassa 'n menzu ssu schifiu  
e ni cummìna chiù di Carlu 'n Francia.  
Na fudda di muderni Farisei  
ti tennu a capizzuni comu nenti,  
ti jinchi di nirbati e di nichei  
e tu nun ti difenni di ssi genti.

Sicilia jisati  
comu poi stari  
addinucchiata  
senza ciatari?  
Nun ti cunnuciri  
nun ti fissiari  
nun è chiù tempu  
di suppartari!

Assuggittata sutta ssu jippuni  
tu nveci assuppi senza dignità,  
sutta ssu juvu misa addinucchiuni  
di cui ti voli senza libirtà.

Sona lu vespru, rumpi ssa catìna,  
è tempu d'ascippari la gramigna  
torna, comu na vota, malantrina,  
vinni lu tempu di la to vinnigna.

Sicilia jisati  
mustra la frunti  
sona lu vespru  
e ci la spunti.  
Nun ti cunnuciri  
nun ti fissiari  
nun è chiù tempu  
di suppartari

## STIDDA D'AMURI

Amuri, sta firita ancora liccu  
zoccu lassasti, chi lassasti a mia?  
Purtasti tutti cosi nzemi a tia  
comu na varca quannu cula a piccu.

E Diu lu sapia com'eru riccu,  
lu sulì ncelu ammatula lucia,  
la stidda chiù lucenti era Maria...  
Mi l'astutau e ora nun ci ammiccu!

E sutta stu gran pisu di duluri,  
ntra stu scurusu abbissu sularinu  
mi va spirennu tuttu lu valuri.

La notti chianciu finu a lu matinu,  
pinzannu sempì a tia stidda d'amuri,  
mi rudu muzzicannu stu cuscinu!

## SITI

Avìa siti di paci  
e mi detturu a biviri  
acqua grevia di puzzu:  
La siti nun mi passau!  
Avìa siti di giustizia  
e mi detturu a biviri  
acqua salata di mari:  
La siti aumintau!  
Avìa siti di libirtà  
e mi detturu a biviri  
'n-bucali di vinu d'annata:  
Miraculu, nun haju chiù siti!  
Mmaliditti, centu voti mmaliditti!  
Cu ssu vinu m'alluppiaru li sensi,  
ruppiru l'ali a la me fantasia,  
calaru li catarratti  
nta l'occhi di la me cuscenza...  
Ora vidu, tra nuvuli di negghi,  
li mei sonni ca si sparpagghianu  
comu fogghi sicchi  
nvrazza a lu ventu di l'egoismu umanu...  
Forsi era megghiu mòriri di siti!

## UNNI, UNNI SUNNU?

Unn'è dda vuci amica  
ddu magicu vastuni  
unni s'appuiava  
la me spiranza antica?  
Unni, unni sunnu  
dd'aria di festa  
ca jinchìa li strati,  
l'amuri, lu rispettu, lu decoru  
e dda sacra amicizia  
ca un tempu avìa valuri  
chiù di l'argentu e l'oru?  
Unni, unni sunnu  
ssi beddi sentimenti?  
Ju vù nta stu munnu  
na gran fudda  
ca tira pi la cutra!  
Paci, giustizia, onuri,  
nun sunnu chiù virtù  
e 'un si ci criri chiù!  
La carità, la fidi, lu pirdunu,  
'un ci su' chiù:  
c'è l'egoismu umanu...  
Ora jiemu pi li strati  
anonimi e scantati;  
e quannu ni ncuntramu:  
vinnemu minzogni  
e minzogni accattamu!

## VIA D'AMELIO

Allucuti, arristamu allucuti,  
cu l'occhi sbarrachiatu,  
ncreduli... scantati...  
'N menzu lu focu, ancora vivu,  
ntra nuvuli di fumu  
zammatava na fudda  
mpazzuta di duluri...  
Manu piatùsi viscugghiavanu  
pizzudda di carni capuliata  
ntamenti li lacrimi  
annurvavanu l'occhi...  
Nàutri cincu agneddi marturiati!  
O Signuri, Signuri,  
nun ni lassari sulu  
a trimari di scantu!  
Stu populu nfilici  
castiatu di la mafia  
abbivira jornu pi jornu  
cu lu so sangu  
li strati di sta terra ginirusa.  
Signuri, nui nun vulemu minnita,  
vulemu sulamenti  
tanticchia di paci e di giustizia  
e pi ssu nenti  
semu pronti a spenniri la vita!

## VIGILIA

Stasira mi sentu tristu e stranu  
'un haju mancu un cocciu d'alligrizza,  
staju affunnannu cu lu cori 'n manu  
nta li funnali chini d'amarizza.  
Daveru nun lu sacciu chi mi pigghia,  
mi sentu addivintatu nicu nicu  
cu vuci chianciulina di nutricu  
addumannu tanticchia di ciatu  
a st'urtimu raggiu di suli ca sfui  
pi sciogghiri lu gruppu c'haju 'n pettu,  
però m'addugnu c'un mi duna cuntù!  
Lu celu moddu e smuntu  
pari un funnu di buttigghia  
lordu di murga appiccicusa  
e li stiddi, tutti nchiavicati  
mannanu na luci annigghiata  
ca metti nta lu cori la malincunìa.  
E, mentri li me' pinseri  
sciamanu scueti, mi buttìa la testa.  
Dumani è jornu di festa  
nta ddu paisi miu assai luntanu.  
Inizia lu fistinu di S. Vitu  
senza di mia, nàutra vota arrassu,  
nàutra vota jittatu a la stranià.  
Cu l'occhi abbuffati di chiantu  
talìu l'acqua di stu mari



culuri cinnirazzu  
e l'unni ca tremanu adaciu adaciu  
pi quarchi ziffata di ventu,  
e mi pari ca sentu  
na vuci canusciuta ca mi chiama.  
Chiudu l'occhi e stennu li pinseri  
pi putiri turnari ndarrerri,  
e comu pi magia, vidu  
la me terra luntana  
la genti paisana  
me matri, li me' frati  
e qualchi amicu  
ca jinchinu li strati  
di lu me regnu anticu...  
E d'accussì, accufurunatu  
a lu solitu postu a puppavia,  
jucannu cu la fantasia  
affucu la me pena...  
Ora lu scuru cunfunni mari e celu  
e tremu pi lu jelu.  
Mutu, cu l'arma ntussicata,  
mi vaju a curcu nta la me cabina  
cu lu stissu disù d'ogni notti  
e suspirannu aspettu la matina!

26 SETTEMBRE 1988

Misu a la posta,  
attagghiu di trazzera,  
cu lu sangu nta l'occhi  
e la lupara 'n manu,  
'n-omu-lupu aspittava  
e ripitia a menti  
l'urtimu attu  
di 'n-anticu dramma  
ca sapia a memoria...  
Sempi la stissa storia,  
storia di sangu e di duluri  
c'annegghia la biddizza  
di sta terra!  
C'era sintùri di morti  
nta la strata,  
ma l'omu-agneddu  
nun lu ntisi, nun s'addunau  
di la ciappula parata:  
- Ariu nettu 'un havi paura di tronu -  
E nveci parsi ca truniaiu  
pirchè si ntisi 'n-corpu di lupara  
e lu sangu nisciu di la firita...  
Accussì morsi Rostagno,  
accussì persi la vita!

C'è ancòra sintùri di morti  
nta dda strata,  
ma Chicca e la so genti  
ci passa tanti voti e nun lu senti!  
Ora Sicilia chianci nàtru figghiu,  
'n-figghiu adottivu  
chi ci appizzau la vita  
pirchè vullà Trapani pulita!

VISITA A LU ZANU...(1)  
(doppu tri anni ca muriu me patri)

Poviru Zanu tuttu abbannunatu,  
arvuli e vigni morsiru di stenti  
unni na vota c'era siminatu  
ora c'è spini, radichi, sarmenti.

Lu ceusu, lu piru, lu ranatu,  
morsiru mazzulati di li venti;  
puru lu magasenu è sdirrupatu:  
di zoccu c'era chiù nun resta nenti!

Ristaru fermi ddà nta la so gnuni  
disoccupati, viduvi, di cantu,  
la fauci, la zappa e lu zappuni

aspittannu la manu di ddu santu...(2)  
- Ammàtula aspittati lu patruni-  
ci rissi, tra lu rucculu e lu chiantu!

(1) *Piccolo podere, tanto caro a mio padre, così denominato dalla contrada su cui insiste a circa tre km. da Mazara.*

(2) *Mio padre.*

## ZÀCCANU

Lu suli curiusannu si ntrattinni  
cu 'n-spiragghiu di luci russu-d'ovu  
quasi vulissi videri la scena...  
Po' ci cuntau lu zàccanu a li stiddi  
cu na palora sula: L'astutàru!  
Ma la spiranza nun muriu a Capaci...  
Firita e vilipisa chiù di tantu.  
risisti a li nirbati di la sorti  
e suspirannu cunta li so morti  
cu la pacenzia di lu picuraru  
doppu ca 'u lupu fici la mattanza!  
Puru sta vota doppu la tunnina  
cu scrùsciu di sireni agghiaccia-sangu  
si prisintaru a lampu cacòcciuli di rangu  
pi cògghiri l'agneddi ammattucati.  
Jucaru a lottu e ficiru cinchina:  
Nuddu vitti, nuddu ntisi, nuddu rastu...  
Ntantu li stiddi quagghianu culostra,  
c'è l'aria mpagghiazata  
ca sapi d'abbannunu e di scunfortu...  
Stanotti lu cori di Palermu  
ntussicatu di raggia e di scantu  
resta a vigghiari 'n pedi li so morti!